


TEZAUUR LITURGIC
7 DECEMBRIE

ACATISTUL
SF. CUVIOS
ANTONIE
DE LA SIISK



MOSCOVA, 2000



Акафист
святому преподобному
Антонию, Сийскому
чудотворцу

Кондак 1

Избраннаго вождя иноков, изряднаго учителя подвижников, добродетельми яко цветы украсившася, чудесы же, яко лучами солнечными, сияюща, восхваляем тя с любовью, преподобне. Ты же, предстоя престолу Пресвятыя Троицы, испроси нам оставление грехов и избавление от всех бед и зол; да житие неблаженно и безмятежно текуще, благодарне зовем ти:

Радуйся, преподобне отче наш Антоние.

Икос 1

Ангелов ревнитель от юности показался еси, преподобне; рождейся во убозей веси, яко гражданин небеснаго Иерусалима ходил еси; прост сый земледелец, первоозванному апостолов

тезоименит и подражатель был еси; Христу последуя, многи ученики собрал еси. Сего ради зовем ти:

Радуйся, рождением радость, яко первенец, родителем подавый.

Радуйся, и на небесех благословение первородных наследивый.

Радуйся, юности буесть издетска отложивый.

Радуйся, словесное млеко Божественных писаний, паче матерня, вожделевый.

Радуйся, в душеполезных учениих сверстники своя превозшедый.

Радуйся, благочестием и разумом наставники удививый.

Радуйся, яко измлада сказания о святых и жительство их возлюбил еси.

Радуйся, яко рано уразумел и презрел еси суету благ временных.

Радуйся, яко дом Божий паче отча избрал еси.

Радуйся, яко издетска навыкл еси песнословити Господа.

Радуйся, яко образ Создателя на дсках живописуя, яснейшее подобие Его на скрижалех сердца твоего вообразил еси.

Радуйся, яко от юности в сердца твоем к небесным восхождения положил еси.

Радуйся, преподобне отче наш Антоние.

Кондак 2

Видяще близ кончину живота своего, благовернии родители твои с молитвою предаша тя и братию твою Господеви. Сего ради и по смерти их не познал еси себе сира, но со благодарением возопил еси Богу: Аллилуиа.

Икос 2

Разумом и испытанием конечно познал еси суету привременных сладости; достигнув же в меру возраста в мужа совершенна, подобно подвигоположнику своему, явившему себе миру, тридцати лет вдал еси себе в службу Господеви; оставив мир и вся, яже в нем, приял еси образ ангельский. Таковое убо изволение твое восхваляюще, глаголем:

Радуйся, яко на распутиих мира сего обрел еси правый путь в Царствие Небесное.

Радуйся, яко оставив дом отца своего водворился еси в дому Господни.

Радуйся, добрый рабе, яко был еси верен Владыце твоему.

Радуйся, яко уже неси раб, но сын и наследник Божий.

Радуйся, яко и в супружестве, како угодити Господеви, помышляя еси.

Радуйся, яко в иночестве всецело Господеви себе предал еси.

Радуйся, яко вожделения плоти обуздал еси.

Радуйся, яко плоть духови покорил еси.

Радуйся, яко раздав имения своя, нищья ущедрил еси.

Радуйся, яко нищетою богатство нетленное стяжал еси.

Радуйся, яко убега еси соблазнов мира и сетей диавола.

Радуйся, горлице пустыннолюбная, исторгнувшаяся от сети ловчи.

Радуйся, преподобне отче наш Антоние.

Кондак 3

Сила Божественная яже укрепи тя, обнощевавша за пять поприщ до святыя обители Пахомиа; егда бо в соннем видении крестом осени тя старец святолепен, рекий ти: возми крест твой и гряди вслед мене, не бояся козней диаволих; ты, в радости востав от сна, всю ночь молился еси Господеви, благодарне воспевая: Аллилуиа.

Икос 3

Имый сердце уготовано в службу Господеви, Сего пречистому образу со слезами радости и благодарения поклонился еси во вратех тоя обители, в нюже вселься, не солгал еси Святому Духу, но паче всех работал еси Господеви. Сего ради зовем ти:

Радуйся, яко препоясался еси с высоты силою.

Радуйся, яко крепце ополчился еси противу плоти, мира и диавола.

Радуйся, яко приискренне принеслся еси Богови.

Радуйся, яко сраспаялся еси Христу.

Радуйся, яко сладце понесл еси бремя Его.

Радуйся, яко смирением украсился еси.

Радуйся, яко вся, яже на земли, мудрования отринул еси.

Радуйся, яко постническими труды Богу угодил еси.

Радуйся, яко глаголы Божественными душу напитал и укрепил еси.

Радуйся, яко бодренною молитвою и псалмопением дух твой окрылил еси.

Радуйся, яко бдении всенощными и хранением сердца уготовал еси себе к зрению невечерняго света.

Радуйся, яко образ жития иноческаго был еси.

Радуйся, преподобне отче наш Антоние.

Кондак 4

Бурю душегубительну непщуя быти славу человеку, из обители в пустыню удалился, идеже храм воздвигл еси, и тамо седмь лет непрестанными труды, молитвами и посты благоугождал еси Богови, немолчно воспевая: Аллилуиа.

Икос 4

Слышав молву и прещения окрестных жителей, помянув еси словеса Христова, бежати от гонящих ны, и сквозе непроходныя дебри привел еси ученики твоя ко езеру, идеже обретеса место, за многа лета в жилище иноком назнаменанное, и посреде дебрей, блат и езер с дивиими зверьми вселился еси. Сего ради взываем ти:

Радуйся, смиренномудрием всяку распрю погасивый.

Радуйся, кротостию злобу победивый.

Радуйся, любовьию вражду отмстивый.

Радуйся, необитаемая места молитвою освятивый.

Радуйся, безмолвныя дебри Божественными песнми огласивый.

Радуйся, в непроходимых стези благи обретый.

Радуйся, в напастех и искушениях терпения и упования не погубивый.

Радуйся, спутники твоя в терпении укрепивый.

Радуйся, в неправедном изгнании, входы Царства Небеснаго обретый.

Радуйся, древо плодоносно, при водах насажденное.

Радуйся, финиче, процветый в пустыни.

Радуйся, яко кедр, иже от Ливана, возвеличивыйся.

Радуйся, преподобне отче наш Антоние.

Кондак 5

Боготечней звезде уподобился еси водяй спутники твоя на место, идеже первее водрузил еси Крест Господень, и слезно молился еси Владыце Христу, сохранить тя от враг видимых и невидимых, и утвердити в терпении нести крест свой и пети Богу: Аллилуиа.

Икос 5

Видя невидимых врагов прилоги, отгонял еси тех, подъемля руце на молитву в трудех и подвизех непрестанных, дивиими точию зелии питался еси; алчущия же ученики твоя, не имый хлеба, словесы Божественными насыщал и укреплял еси, дондеже некто, мимоходяй, подаде ти вся потребная к препитанию и

строению обители. Сицевому убо смотрению Божию, якоже и вере твоей дивящися, радостно вопием ти:

Радуйся, безсилне темных сил обличивый.

Радуйся, силу молитвы победительну показавый.

Радуйся, веру непоколебиму стяжавый.

Радуйся, упование неотложно сохранивый.

Радуйся, любовь нелицемерну и безкорыстну соблюдый.

Радуйся, всяко житейское попечение отложивый.

Радуйся, всяку печаль на Господа возвергий.

Радуйся, терпением во искушениях, мужество неборимо явивый.

Радуйся, мудрый строителю, не на песце, а на тверде камени зиждяй.

Радуйся, яко нищ быв Господа ради, доволен был еси многи боголюбцы собрати и препитати.

Радуйся, ничтоже имый, вся содержи.

Радуйся, в промышленности любви Божия, источник всякаго довольства неизсякающ обретый и иным явивый.

Радуйся, преподобне отче наш Антоние.

Кондак 6

Проповедник святыни твоея, преподобне, явися враг твой, един от приставник к собиранию даней; он бо, непщюя тя имуща стяжания многа, наят разбойники расхитити обитель твою, но не возможе озлобити ю, народа ради, со оружии обстояща ю; уведевый же, яко не человеки, но Силы Небесными охраняешися, при ногу твоею раскаяся о зле, просяй прощения. Ты же незлобив сый, с любовью отпустив его, воспел еси Богу: Аллилуиа.

Икос 6

Возсиял еси яко звезда светлая, лучами святыни озаряя Россию; слава добродетелей твоих промчеса по всем градом, привлекащи многия во обитель твою. И царь, послав тебе грамоту, да строиши пустынное жительство, предаде себе и царство свое твоим богоприятным молитвам, имиже ограждаеми зовем ти:

Радуйся, российских царей предстателю.

Радуйся, Отечества твоего хранителю.

Радуйся, светильниче, горяй любовью и светяй святынею.

Радуйся, воеводу полка иноческаго.

Радуйся, правый водителю ищущих спасения.

Радуйся, силою Божиею изымаяй из плена греховнаго.

Радуйся, свободжай от работы суетныя.

Радуйся, многия козни лукаваго помощию Божиею победивый.

Радуйся, исполняяй души сладостей духовных.

Радуйся, источаяй токи слезныя из сердец окамененных.

Радуйся, воздеянием руку твоею, спасаяй нас от нападений мысленнаго Амалика.

Радуйся, преводяй благопокоривыя ти в землю, святым обетованную.

Радуйся, преподобне отче наш Антоние.

Кондак 7

Хотяй насыщати словесы Божественными и песнми духовными собранное тобою стадо, создал еси храм Живоначальныя Троицы, и

неописанный образ Троицаго Божества потщался еси вообразити на иконе, споспешествующу ти самому Господу, Емуже в посте и молитве работал еси, вопия: Аллилуиа.

Икос 7

Новое чудо яви Господь, изнесый невидимою рукою честную икону из горящия церкви и невредиму ю поставивый посреде обители; ты же, радуясь, приемь ю, с упованием на Господа, новый пространнейший дом Пресвятей Троице воздвигл еси, и инья храмы надал еси, и тако обитель благоустроил еси, юже и ныне ограждаеши молитвами твоими, спасая вопиющыя ти:

Радуйся, яко твоими молитвами новый источник благодати Божия отверзся.

Радуйся, яко икона Пресвятыя Троицы, тобою начертанная, чудеса прославися.

Радуйся, яко в пустыни обитель благочестия процвете.

Радуйся, яко тобою пристанище благоотышно душам уготовася.

Радуйся, яко тобою училище покаяния устроиася.

Радуйся, яко тобою открыся путь хотящим к почести вышняго звания тещи.

Радуйся, яко тобою лествица духовных восхождений утвердися.

Радуйся, яко ищущим спасения от потопа греховнаго нов корабль тобою исправися.

Радуйся, яко во обители твоей исцеляются недуги душ и телес.

Радуйся, даяй прибежище целомудрию, постничеству и вольней нищете.

Радуйся, яко ищущии твоего предстательства, присно милость Божию обретают.

Радуйся, яко приял еси благодать молитися о всех.

Радуйся, преподобне отче наш Антоние.

Кондак 8

Странная чудеса во обители твоей сотвори Господь своею иконою, юже из пламене чудно спасе; точию бо прикоснуса к ней усты слуга некий, абие свободися от духа злаго. Иный слуга, положен быв пред нею, избавися падучия болезни; и сестра иереа, слепа сущи, абие прозре, егда облобызаше чудотворный образ

Пресвятая Троицы. Сего ради и мы Пресвятей Троице вопием: Аллилуиа.

Икос 8

Весь собор инок едва возможе преклонити смирение твое к приятию игуменства; еже приемь, дивен настоятель был еси, первенствуя в трудех иноческих, яко мний всех и раб всем показуяся, рубищем покрывая себе, смиренным же зраком утаевая обилие благодати и богатство святыни. Сего ради приснии радовахуся, прищельцы же не мняху тя начальника быти, мы же умильне зовем ти:

Радуйся, яко мний мняйся быти, велий у Господа славы вменился еси.

Радуйся, яко уча ины творити, вся первее сам сотворил еси.

Радуйся, яко ночь не преможе твоего бдения.

Радуйся, добрый страже дома Божия.

Радуйся, яко в зраце твоем присно являшеся трезвение ума твоего.

Радуйся, правило веры и образ смирения.

Радуйся, яко тягчайшыя работы люботрудне со всеми разделял еси.

Радуйся, яко болящым усердно послужил еси.

Радуйся, яко странныя ввел и нищья препитал еси.

Радуйся, яко немощи немощных терпеливно понесл еси.

Радуйся, преподобне отче наш Антоние.

Кондак 9

Всяку славу и честь аще и праведне тебе воздаему от человек, непщюя быти виновну лишения славы Божия, предал еси власть твою единому от ученик твоих, и со единым от них тайно отшел еси во остров един, идеже вдал еси себе непрестанней молитве, трудом и пощению, бодренно воспевая Господеви: Аллилуиа.

Икос 9

Ветия дивен был еси, присно от сердца исполнена любве глаголяй и помышления человеческая духом провидяй, одинаго от ученик твоих предварив, наставил еси не отлагати обеты иноческия ради мирския прелести; и утешив его словесы Писания, возбранил еси злomu помыслу возвратитися в сердце его. Сего ради зовем ти:

Радуйся, изряднейший врачу духовный.

Радуйся, верный наставниче умов заблуждших.

Радуйся, сердец мятущихся упокоителю.

Радуйся, злых начинаний разорителю.

Радуйся, благих помыслов насадителю.

Радуйся, святых желаний внушителю.

Радуйся, расслабленные воли укрепителю.

Радуйся, искушений и соблазнов избавителю.

Радуйся, от прилогов диаволих защитителю.

Радуйся, унылых и отчаяющихся утешителю.

Радуйся, усыпленных совестей возбудителю.

Радуйся, путей покаяния и спасения мудрый сказателю.

Радуйся, преподобне отче наш Антоние.

Кондак 10

Спаستися хотящии стужаху ти, приходяще в пустынную келлию твою; сего ради далечайше в дебрь отбегл еси, и во глубине гор, аки в конобе, водворился еси, и тягчайшыя подвиги подъял еси, презрев страхования демонов и обнажив до

чресл тело мшицам, в молитве терпел еси, воспевая Богу: Аллилуиа.

Икос 10

Стеною крепкою и оплотом надежным был еси обители твоей, егда возвратился еси в ню ко учеником твоим, разсеяться хотящим, и добре пасл еси стадо твое; уста бо твоя, яко сот мед, искапаху словеса благодати, зрак же твой являше кротость и любовь отчу, седина извествоваше мудрость ума и чистоту сердца, согбенный вид твой, старче Божий, подобяше тя древу, красных плодов обилием долу преклонену. Сего ради зовем ти:

Радуйся, красото Церкви Христовы.

Радуйся, сосуде святыни.

Радуйся, цвете иночества.

Радуйся, светильниче миру.

Радуйся, красное здание благодати Христовы.

Радуйся, преукрашенный храм Святаго Духа.

Радуйся, новый образе Божий.

Радуйся, подобие Христово.

Радуйся, дражайший кораблю, вносяй в пристанище неисчетна сокровища духовная.

Радуйся, купец, приумноживый в данные ти от Бога таланты.

Радуйся, верный приставниче дому Божию.

Радуйся, преподобне отче наш Антоние.

Кондак 11

Пение Господеви совершившим учеником твоим, в праздник боголепнаго Преображения Христова предложил еси во славу Божию велие и чудно учреждение на трапезе, якоже и Господь сотвори; повеле еси рыбарем, обнощъ все труждавшимся о ловитве рыб, паки вовеши мрежу во езеро, и якоже предрекл еси им, извлекоша множество великих и различных рыб, яко всем дивитися, и дивному во святых Богу воспети: Аллилуиа.

Икос 11

Светозарную жизнь скончавая, (седмидесяти девяти лет) старец сый, яко отец чадолюбив, вся смотрителне устроил еси во обители твоей. Ученики твоя, о скорем преставлении твоём скорбящия, наставил и утешил еси; уставы общежития писанием утвердил еси, и вместо себе иного игумена нарекл еси; сам же во бдении и молитве не вкусил еси покоя, дондеже

Господеви предал еси святую душу твою. Ученицы же твои, возвратишися из храма и видевше тя бездыханна лежаща, руже же яко молящуся при персех имуща, со слезами возопиша:

Радуйся, благий наш отче, зряй ныне Отца светов.

Радуйся, пастырю наш добрый, предстояй ныне пастыреначалнику Христу.

Радуйся, питателю наш, сладостьми небесными насыщайся.

Радуйся, покровителю наш, во кровех небесных водворивыйся.

Радуйся, предстателю наш пред Богом, ангельская зряй утешения.

Радуйся, сожителю святым небожителем.

Радуйся, гражданине горняго Иерусалима.

Радуйся, священная главо, венчанная от Царя славы.

Радуйся, зрителю Триипостаснаго Света.

Радуйся, ведче божественных таин.

Радуйся, на лоне любве Божия упокоивыйся.

Радуйся, радостей ради небесных, всяку болезнь и печаль конечно забывый.

Радуйся, преподобне отче наш Антоние.

Кондак 12

Благодати сосуд честное тело твое, не дерзнуша ученицы твои, по глаголу твоему, изврещи в дебрь на растерзание зверем, или обесити на стене в снесь птицам или потопити во езере; но праведно разориша завещание твое, благочестне положше мощи твоя во храме Живоначалныя Троицы и гробницу твою украсивше святыми иконы, по всяк вечер усердно стекахуся пети над нею надгробная: Аллилуиа.

Икос 12

Пети вся чудеса твоя не возможем, многа бо зело дивная сотворил еси и по смерти твоей. Сего ради веруем, яко ныне на небесех живещи, и приносимая тебе пения милостивно приемлещи, и паче дерзаем глаглати:

Радуйся, божественный врачу, всяку болезнь и всяку язю скоро исцеляяй.

Радуйся, расслабленныя возставляяй.

Радуйся, и малодушныя утверждай.

Радуйся, слепыя видети творяй.

Радуйся, и помраченныя умы, смысленны деяй.

Радуйся, и неверующыя веровати научаяй.

Радуйся, уповающыя спасаей.

Радуйся, из греховныя бездны изъемляй.

Радуйся, от насилия демонскаго свобождаей.

Радуйся, к самоубийству текущыя воспящаяй.

Радуйся, паче надежды помощь подаваяй.

Радуйся, и не звавшым тя, яко зван, благовременне помогаей.

Радуйся, преподобне отче наш Антоние.

Кондак 13

О предивный чудотворче и великий угодниче Христов, преподобне отче Антоние, предстояй ныне престолу Пресвятыя Троицы, приими от нас грешных приносимая ти хвалебная пения и молитвами твоими испроси нам у Господа отпущение грехов, избавление от бед временных

и спасение от мук вечных, да с тобою выну Триипостасному Богу воспеваем: Аллилуиа.

Кондак сей глаголи трижды, таже икос 1-й и кондак 1-й.

Молитва 1

О предивный чудотворче и великий угодниче Божий, преподобне отче Антоние, пастырю наш добрый, теплый заступниче и скорый помощниче; предстояй престолу Пресвятыя Троицы, призри милостивым оком на ны и на вся люди, благоговейне притекающыя к честному гробу твоему, в немже лежащыя святыя мощи твоя, от дний древних нетлением цветущыя и благодатию Животворящаго Пресвятаго Духа благоухающыя, исцеления от всяких недугов душевных и телесных неоскудно источают. Услыши нас молящихся тебе и чтущих святую память твою. Простри руке твои ко Владыце небесе и земли, страждущую страну Российскую от лютых безбожников и власти их да свободит, и да возставит престол православных царей, верных рабов Его, в скорби и печали день и ночь вопиющих к Нему, многоболезный вопль да услышит и да изведет от погибели живот наш, и испроси нам оставление

прегрешений наших. Моли милостиваго Бога отвратити от нас всякий гнев Его, праведно на ны движимый и сохранить не точию обитель нашу, но и вся грады и веси, и вся страны христьянския, и люди живущыя в них от града и глада, от труса и потопа, от огня и меча, от нашествия иноплеменных и междоусобных брани, от смертоносных язвы и всякия пагубы и всякаго зла, даровати же нам вся к жизни временней благопотребная и к вечному спасению полезная. Помози нам, святче Божий, избежать пагубных сетей диаволих, препобедити соблазны мира и умертвити уды наша сущыя на земли; отврати очи наши от суетных и прелестных вещей земных, направи же умы и мысли наша к зрению красот божественных, пренебесных и нетленных; сердца наша, недугующая страстьми греховными, исцели, да не прильпнут сластем привременным, и безместным; согрей же я божественною любовью, да вожделют истиннаго и непреходящаго блаженства, еже в Бозе. Укрепи нас ко исполнению заповедей Господних, даждь нам покаяние сердечное и умиление слезное, молитву непрестанную и трудолюбие неослабное, бодренное трезвение

ума и хранение сердца, мир помыслов, чистоту желаний, правоту деяний, да избавльшеся тобою от всех враг видимых и невидимых, от всяких зол душевных и телесных, и соблюдше веру правую, надежду неотложную и любовь нелицемерную, богоугодне скончаем житие наше на земли, и прешедше в жизнь вечную, сподобимся зрети трисветлую зарю трисияющего вечнаго Солнца, и в невечернем дни Небеснаго Царствия, купно с тобою и со всеми святыми, благодарне воспевати и благословити Пресвятую Троицу, Отца и Сына, и Святаго Духа, во веки веков. Аминь.

Молитва 2

О богоблаженне и приснопамятне отче наш Антоние! Не мним тя мертва суща, аще телом и преставился еси от нас, но жив в соборе ангелов водворяешися. Моли за ны, избранниче Христов, и не презри нас верою и любовию чтущих тя, поминай нас недостойных у престола Царя Небеснаго, тебе бо дадесе благодать молитися за ны, О, заступниче и молитвенниче наш добрый! Се бо святых мощей твоих рака пред очима нашими видима есть, сохраняй убо нас всегда от сетей вражиих; молися ко Господу

о спасении душ наших и испроси нам покаяния
время и христианскую кончину безболезненну,
непостыдну, мирну, да невозбранно преждем
мытарства воздушных князей и сподобимся
Небеснаго Царствия со всеми угодившими
Владыце неба и земли, Господу нашему Иисусу
Христу, Емуже подобает всякая слава, честь и
поклонение всегда, ныне и присно и во веки
веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**